

明代論著叢刊
第三輯

白

榆

集

(下)

明·屠隆撰

偉文圖書公司印行

不登出所積賑黔首無饑者尋擢南京刑部員外郎
州民謳歌思公生而廟食以配鄭上卿公孫儵漢丞
相故潁川守黃霸語在州乘中居南都一歲以錢夫
人憂歸服滿補刑部員外郎時天下當鄉試執政者
議遣京朝郎出典其事公得河南所拔多知名士若
少傅郭公朴尚書劉公自強魏公尚純侍郎喻公時
咸公所進至與公並貴而同聲遷廣西按察僉事提
督學政廣以西故密箐大藤壤其俗多椎不文公至
則躬先教化增益稅文而尤拳拳以士務華絕根爲

戒西人彬彬興起至今蘭臺石室九列百司諸賢時
有之遂與上國埒靖江王驕禁其國尉卒子弟毋得
充諸生有試者必以賄不則罪其父若兄公移文長
史司古立賢無方王柰何錮人於聖世而又以賄假
人失藩服奉公之義復爾先論劾長史王聞之懼乃
止而公嘗暑按察篆有大猾得罪匿王官中公捕之
正法王滋銜之其後與御史監司競而上疏首証公
上爲遣給事法曹緹騎勘其事王坐奪祿國臣以下
抵罪公亡所優考最賜 誥進四川布政使司左叅

議分守川東西北三道所至督有司省刑薄賦察冤
理在蜀人至今德之遷山東按察副使巡視海道所
部登萊歲饑俗獷民逃枹鼓之聲不絕於徼公多方
設法安集流離禁戢跳梁海上間左始訢訢有樂生
之心會御史檄公監試事錄成進御時相釋憾于御
史者摘錄中語以爲謗訕 詔逮御史及公時傳

上怒叵測公徐曰上明聖詎忍以口語殺人君威譬
之雷霆寧妄下擊人卽下擊人寧可逃乎尋得赦謫
廣東河源典史道轉贛州府推官丁願庵公憂服除

福州府亡何轉南京太僕寺丞再轉南京禮部祠祭
郎中復爲江西按察司副使整飭贛州兵備兼分巡
嶺北道往來絕徼救寧軍民掃平峒蠻公伐爲多遷
浙江左參政分守杭嘉湖道方行部鹽官而島寇猝
至圍之數十匝時無見兵城中大恐公親督吏民晝
夜立矢石間畫戰禦之策賊知有備乃解圍去城賴
以完進雲南按察使未赴擢江西右布政使居亡何
遷浙江左布政使首革臧吏出納之弊郡邑來上賦
者無所苦亦不得因緣取羨竒又數佐其直指使者

禁斤食墨以惠綏元元入覲與太宰御史大夫抗辯
賢者往往理直多虛懷從公事峻擢都察院右副都
御史巡撫河南下車問閭閻父老所疾苦與郡邑羣
牧有司不職狀恩行如春威行如秋風裁隱起微恭
王以左道蠱上其子庶人載掄益行恣睢多掠良
家子女充後宮侵奪民田所戕殺不辜無筭事聞下
公按治公與御史悉發其姦利不道事論廢徙皇
祖陵削其國秩盡奪占產還民其後伊庶人復橫公
又輒撲其燎原翦其羽翼伊竟得罪境內晏然遷刑

部右侍郎尋擢南京工部尚書通工平稅國課以充
而民不見朘削又督修 皇祖陵及 孝陵有功荷
上白金綵幣之錫召爲刑部尚書時都御史章公煥
論事名觸上諱詔下法曹將坐以誹謗公謂此偶然
人臣言事不慎洵有罪寧敢誹謗君父者巡撫雲南
都御史游公居敬將征東川夷調發兵食頗擾民而
興沐黔國有隙沐中之被逮將坐以擅興師激變公
謂游特行事不當物情耳師奉 明旨非擅興夷情
故狡叵測非激變二公雖竟遠戍得不死公之執法

明允不苛類若此改都察院左都御史益嶽嶽持大
體秉憲貞度不嚴而肅所條上飭臺綱剔吏弊蘇民
瘼前後二十餘事咸中窾窾上皆嘉納之以二品
滿三載上特遣中涓賜鈔緡羊酒予誥進階資政大
夫封二代錄一子入太學會大風霾自陳不允偕太
宰考察百僚一以公議當是時分宜尚在事厚不能
奪其操所黜陟幽明羣情帖服充廷試讀卷官屬方
伯君成進士爲刑部郎以材調禮部有言官撫其事
論太宰及公公復自陳上念公春秋尚優詔許致

仕而特爲太宰明所以遷方伯君意謂亡所私公旣
歸闔門謝事一以經史自娛著作日富詩自唐開元
大曆以上遡漢魏六朝文自昌黎四子而直追先秦
兩漢才必就格氣必根理泛濫百氏而要歸諸六經
公卽鴻鉅大人以勲烈顯而操觚之業若此雖號稱
雕龍名家者猶下之且雅善玄素之道鍊精烝修玄
牝日與羽客方士講五金八石蓋庶幾葛稚川陶都
水之流又得彭祖術神明視履老而不衰卽無論
舉事或可逍遙長年而大運告去以胖疾終嗚呼痛

哉距其生蓋弘治丙辰之三月二十六日也享年八十有七公爲人豐下廣顴眉目朗秀望而知其爲有道貴人也生平魁磊侃直不善爲骯骯而儀度溫溫了無峻厲色譬之大海長風下擊洪濤隱隱當其不激平波萬里瀕洞混茫淺者蓋莫得而窺其量焉而藏用韜光虛以游世以故歷中外涉夷險處大憝之縱衡當權宰之簞弄而從容閑暇卒能以功名福德自完難矣當其奔走勩勩經營天下數十年外罷筋骨內耗心神見以爲用世之器及歸治菟裘撫雲壑

與抱朴尚玄之士日談性命而尊餘生卽出世之韻
又何脩遠哉乃知曩日之營營而無損者以虛故也
公至性孝友事願庵公及錢夫人備極情文生死無
憾逮其歸老而諸弟溫州君惠刑部君忠光祿君恕
相繼來歸年齒皆七十以上爲築四老堂于宅西大
備幽人之致日相扶携婆娑芳園嘉樹間而學憲方
伯及公少子都事允亮以休沐歸省侍公尊罍綵衣
金紫光照林壑鐘鼓簫管聲與山溜松篁相應以畢
人生之歡而極天倫之樂古香洛耆英乃聚一門嗟

乎詎不盛哉公念有餘因首捐以供墓祭歲時合族而饗之教其不知而恤其不足有齊相晏子宋范文正風自公之歸中丞臺御史臺無歲不薦公於朝上老之特詔進公榮祿大夫今上之六年復詔有司具幣餼存問時人榮之至是卒上所覃恩崇典鴻禮有加弗替至謚曰恭定貌公一何肖也卽 聖天子之知公深矣公始娶于包早卒贈宜人加贈夫人繼曹氏封宜人加封夫人先公卒子男三長卽允哲陝西提學副使娶王氏贈孺人加贈恭人繼項氏再封如

王次卽允端四川右布政使娶顧氏封安人加封宜人
次卽允亮南京後軍都督府都事先卒娶儲氏贈
孺人繼王氏封孺人咸以學術世其家女一受南寧
府通判瞿講聘而殤俱曹夫人出孫男八雲驥國子
生娶孫氏雲樞官生娶楊氏雲龍國子生娶顧氏雲
夔國子生娶莫氏雲鳳國子生娶趙氏雲獻國子生
娶呂氏雲柯娶顧氏雲楚聘姚氏孫女六長適官生
陸彥楨次適國子生徐元普次適國子生艾大有次
適國子生喬拱宸次受王士驥聘次未字曾孫男二

嗣定聘王氏紹定尚幼曾孫女四長適國子生顧
起次受庠生吳玄聘而場次受喬一琦聘次未字所
著有易經輯義三卷詩經輯說七卷詩韻輯畧五卷
美芹錄二卷祁州志八卷笠江集若干卷行於時銘
曰高陵片石削成刺天太山喬嶽回絕綿延蔽虧莽
至杳無其端倪澤之水空碧下映觸而激之蕩漾靡
定茫茫太壑洪廓深靚濤混六合平則如鏡世有偉
器固非常倫含光憲允不耀其神迫而復動霍然鱗
吻及其收之雷滅颺舉舞中乘林音協大品龍蛇其

德其用無涯出掉日月入閼雲霞卓爾瓌碩德音孔
嘉在易九三公之謂邪見而復潛疇測其遐勛業旣
了婚嫁亦畢五岳在胸三山在室默朝上帝夢遊崑
崙一朝長別形逝神存古也疇匹子房長源

明故光祿大夫杜國少傅兼太子太傅吏部尚
書建極殿大學士贈太保謚文簡豫所呂公

神道碑

文簡公以宿學名德受知 穆廟迄今 上以仲年
嗣位遂采物望登三事維時寅亮之業煜霄茂明而

尺知幾乞身終始醇白爲一代完德鉅人實首推公
公姓呂名調陽字和卿號豫所其先楚興國之大冶
人洪武初遠祖文勝從軍天長徙桂林遂家焉曾大
父鑑娶于劉生綱卽公大父綱耻隸軍伍始折節讀
書補郡弟子蚤世生子璋自號古愚子卽公父古愚
公束髮讀書才名藉甚僅用歲薦仕爲徐聞令有惠
政徐聞人至今尸祝之比居鄉與其配張太夫人莊
好行陰德鄉人慕義無窮而識者謂呂氏先兩公咸
以儁才天閼不甚暢融卜其後宜大古愚公生三子

長應陽爲郡諸生卒次卽公公生有異徵蚤慧望而
知其國器生十九年嘉靖甲午舉于鄉庚戌賜及第
第二人授翰林編修癸亥稍遷國子司業乙丑擢春
坊諭德隆慶改元遷南京國子祭酒尋改國子祭酒
冬擢南京禮部侍郎戊辰改禮部侍郎莊皇帝講帷
拳匕以弼成主德康乂生靈爲已任諷議凱切成發
于至誠 穆廟每爲動容采納踰年改吏部尋以吏
部左侍郎兼翰林院學士掌詹事府事壬申今上初
卽位拜禮部尚書維時 穆皇升遐 冲聖嗣服廟